

## Tona Tupuranga

Kāre kau, Kore rawa atu, kāre i pai ōku mātua kia haere au ki tērā mea ki te kura, ka kī atu au ki aku hoa, mehemea i haere au ki te kura e mōhio ana au e raruraru katoa koutou i au ko au tēnei

Ā nā taku whaea he a e i o u na ka mōhio au i te tuhituhi, ā heoi anō na ka kī mai ia, ka haria atu te kī nei na, ki te ei, ki te o, ki te rā, kia ora, nā kātahi au ka kī āe ka haria mai tērā kupu nā ki konei nā, tēnei ki tēnei reta nā ki konei nā, kāo, na kua whērā taku whakaaro nei ki ngā tuhituhi raka, oo kia pai, kaaa ora taku ngākau, kua mōhio au he pērā te whakatū kōrero e oti ai hei kupu māu ne, na te a i o raka,

He tika, i haere mai ka tae mai kātahi ka kī mai ki au i haere mai au kia haina koe i taku pukapuka, kei te haere mai te hiko i runga i tō whenua, kātahi au ka kī atu kāre au e pai kia haere mai tēnā mea i runga i taku whenua, kua oti rā te kaupapa nei, kāore au e pīrangī kia haere mai, he aha te take i kore ai koe e pai kia haere mai te hiko, ka kī atu au kei motu ngā waea kei ki runga i ngaku taiapa, ka mate mātou ko aku tamariki, e rongō ana hoki au ki te taka te hiko, i tēnā waea ki runga i ngā taiapa, i ērā mea ki te kuhu koe i tō taiapa, ka mau koe ki reira ka mate koe, ka kī mai te Pākehā nei, kāre rā e motu ērā waea, ā kāre tonu au e whakaae, kāre au e whakaae, kāre au e pai, kore au e haina i te pukapuka a te Pākehā nei, kātahi ka mea, ka haere ko taku koroheke ka haere rāua ko te Pākehā nei, hainangia atu e taku koroheke, kātahi au ka kī atu, e mōhio ana koe kāre koe e tika ana ki te haina i te pukapuka rā, nōku kē te whenua nei, a hei aha atu te kōrerongia hoki e ia, kātahi ka kī mai a kua haere mai te Pākehā ah well kei te haere mai, e pēhea ana koe kia maka he hiko ki roto i tō whare, kāre au e pai ki tēnā mea ki te hiko, ooo he pai te hiko, kāre hoki he paruparu kāore hoki he aha heoi anō tāu, ā kāore au e pai kei mate au i tēnā mea, kore au i whakaae kei waho tonu i taku whare tētehi o ngā pou o te hiko, ka kī atu au kāre au e pai ki tēnā mea, kore atu. Ka kōrero mai te Pākehā ka kī atu au kāore au e pīrangī, haere atu, heoi anō ka mahi te Pākehā ka honohia katoa ngā hiko o ētehi e noho ana au i roto i taku whare a ko taku kānara, a ko taku rama karehēni, na koinā taku raiti, ā kua ngiha ngā tō a ētehi ngā tō hiko, ka kī mai tee pai e, e hoa, kāre he paruparu, a hei aha atu māku tēnā, kei haria mai ki au, ka mate au i tēnā mea i te hiko, kātahi nā, e whia tau rā i muri mai ka kī atu au kāre anō i mate he tangata, hu, kua āhua pīrangī hoki au, kua haere mai taku tamaiti, te pāpā o Moari, kua haria mai he waerahi māku te pai o tēnā waerahi mā te hiko ka tangi, ai kua tika me tonu anō e au ngā Pākehā nei kia haria mai he hiko māku, ā tae mai ngā Pākehā, ngā

mea ngā mahi ahuhenua nei, te Māori Affair nei, i raro hoki au i a rātou, hei, kua pīrangī au ki te hiko māku, kātahi ka kī mai kāre e taea hei mahi he hiko māu, he nui rawa te utu, tētehi, ha, he matara noa atu ngā transfomer, e kore e tae mai, kei te pīrangī au ināianei te hiko me mahi he hiko māku, kua tohea atu anō e au ki te Pākehā, he nui rawa te utu, ā hei aha atu māku tēnā, kāre au e raruraru ana ki te utu kia mahia mai tētehi hiko māku kua pīrangī au ki te mea, kāre hoki e kite ana kua mate he tangata, nā wai ā ka whakaaengia mai taku hiahia ka kī mai a kia ahu ake tētehi ki konei, kia ahu ake he hiko ki konei, kia haere mai ki tā mātou pūtia, ā ka whakaaengia rā he hiko māu oh ka pai tēnā, nā a ka mahia mai taku hiko, ka whiwhi hiko au, kātahi ka noho mai i konā ka noho mai kua mahi whare au mōku ki konei, kātahi anō au ka haere i te Pākehā ki te tari i Te Awamutu, he aha tō pīrangī Mihi Pikia? Kei te pīrangī au ki te hiko mō taku, mō tērā o aku kāinga hou, kātahi ka titiro mai ki au, kātahi ka kata, kātahi ka kī mai ko koe anō te wahine kāre nei i pīrangī i te hiko.